

Պետության

կողմից

երաշխավորված

անվճար հիվանդանոցային բժշկական օգնությունը և սպասարկումն ընդգրկում է բուժման համար անհրաժեշտ միջոցների ամբողջ ծավալը, մասնավորապես՝

- ✓ հիվանդին հիվանդասենյակով ապահովումը,
- ✓ մասնագիտացված խորհրդատվությունները,
- ✓ լաբորատոր-գործիքային ախտորոշիչ հետազոտությունների անցկացումը, ընդ որում հետազոտությունների այն տեսակները որոնք բացակայում են բուժօգնություն իրականացնող կազմակերպությունում (բացառությամբ թանկարժեք և դժվարամատչելի լաբորատոր-գործիքային ախտորոշիչ հետազոտությունների), պետք է կատարվեն բուժհիմնարկի միջոցների հաշվին, պայմանագրային սկզբունքով այլ կազմակերպություններում, որոնք ունեն տվյալ ծառայության իրականացման լիցենզիա, իսկ բացակայող թանկարժեք և դժվարամատչելի հետազոտությունները պետք է կատարվեն տվյալ բուժհիմնարկի ուղեգրով՝ այն կազմակերպություններում, որտեղ ՀՀ առողջապահության նախարարության կողմից տվյալ ծրագրով տեղադրված է պետական պատվեր:
- ✓ վիրահատությունները, վիրահատական և ֆիքսող միջոցները,
- ✓ բուժական միջամտությունները,
- ✓ անհրաժեշտ դեղամիջոցներով և բժշկական նշանակության առարկաներով ապահովումը, ընդ որում առանձին դեպքերում բուժումը հիվանդի կողմից բերված դեղամիջոցով թույլատրվում է կազմակերպել հիվանդի համաձայնությամբ, հիվանդության պատմության մեջ ձևակերպված հիմնավորվածությամբ և բուժհիմնարկի ղեկավարի թույլտվությամբ:
- ✓ թթվածնի և բժշկության մեջ կիրառվող այլ գազերի օգտագործումը,
- ✓ ֆիզիաթերապևտիկ բուժումը,
- ✓ հիվանդի խնամքի ապահովումը միջին և կրտսեր բուժական անձնակազմի կողմից,
- ✓ այլ անհրաժեշտ բժշկական, հարբժշկական ծառայությունները,

- ✓ հակատուբերկուլոզային, հոգեկան, թմրաբանական և վերականգնողական (առողջարանային) բաժանմունքներում հիվանդանոցային հատուկ խնամք պահանջող դեպքերում՝ նաև հիվանդների սննդով պարտադիր ապահովման ծախսերը:

Այն դեպքում, երբ հիվանդանոցային բժշկական կազմակերպություններում բացակայում են հիվանդի բուժման կազմակերպման համար անհրաժեշտ մասնագիտական խորհրդատվությունների, լաբորատոր գործիքային ախտորոշիչ հետազոտությունների անցկացման հնարավորությունները, հիվանդանոցային բժշկական օգնությունը և սպասարկումն իրականացնող բժշկական կազմակերպությունը նախատեսված միջոցառումները կազմակերպում և ապահովում է այլ բժշկական կազմակերպություններում՝ պայմանագրային հիմունքներով, կատարելով փոխհատուցում հիվանդի բուժման համար հատկացվող համապատասխան գումարներից:

Հիվանդանոցային բժշկական կազմակերպություններում բուժաշխատողների կողմից ՄԻԱՎ-ի վարակի վերաբերյալ հետազոտություն և խորհրդատվություն տրամադրվում է Հայաստանի Հանրապետության առողջապահության նախարարի համապատասխան հրամանով հաստատված՝ ՄԻԱՎ-ի վարակի վերաբերյալ խորհրդատվության և հետազոտության կարգում նշված բնակչության խմբերին և կլինիկական ցուցումներին համապատասխան: